

# Purtar or la posta en mintga chasada

## La Posta fa sia obligaziun

DA LUCAS DEPLAZES / ANR

■ **Duas moziuns pretendan ch'il cussegl federal midia la lescha e procura per ina distribuziun da la posta en mintga chasada occupada sur onn. Doris Leuthard conferma che La Posta adempleschia sia obligaziun.** L'ultim temp è stada exponida La Posta a dira critica en la pressa naziunala. Suentar la restructuraziun da la rait dals uffizis da posta vegn uss il servetsch da distribuziun en discussiun. La lescha da La Posta garantescha il servetsch da basa per brevs, gasettas e pachets. La Posta transportescha e parta ora tut questas spediziuns postalas durant almain tshintg dis l'emna, gasettas dal di durant sis dis. La distribuziun è garantida en chasadas occupadas sur onn.

En ses rapport dals 6 da zercladur 2017 constatescha la cumissiun da surveglianza PostCom che sulettamain 0,07% da las chasadas èn exclusas da la distribuziun a domicil. Las excepziuns èn dendant s'augmentadas e pertutgan actualmain 1133 chasadas, situadas en la periferia.

En duas sentenzias ha il tribunal amministrativ federal confermà l'agir da La Posta. Sin fundament da questa posiziun saja da quintar che La Posta desistia en l'avegnir da purtar las spediziuns postalas a domicil en abitadis sparpagliads, fa attent PostCom.

### Il parlament fa squitsch

En ina moziun fa *Raymond Clottu*, (ppsl/NE) attent a divers cas nua che La Posta ha exclus da purtar las brevs e las gasettas a domicil. Pertutgadas èn principalmain chasadas in pau giu da via. Clottu criti-

tescha che La Posta saja vidlonder da dismetter la distribuziun en lieus pli allontanads. Questas famiglias sajan las unfrendas da la nova politica da manaschi da La Posta, instradada dapi il mais da december 2012. L'ordinaziun prevesa la si-

stida da la distribuziun sche l'abitadi rural dumbra damain che tshintg chasadas sin ina hectara u sche la via tar la chasa surpasa duas minutas. Quella prescripziun posia avair per consequenza che lieus pauc rentabels vegnian exclus dal servetsch da

distribuziun. Er las regions ruralas han il dretg d'existenza. La midada succeda mintgamai en cas da midada da possessur u da locatari. En la medema crenna dat er ses collega cusseglier naziunal *Maire Jacques-André*. En la debatta ha cusseglier dals chantuns *Stefan Engler* (pcd/GR) fatg attent a la muntada dal servetsch postal per las regions periferas e proponì da fixar criteris regionalis davart la distribuziun en abitadis sparpagliads e quai en connex cun la revisiun da la lescha da La Posta.

### La Posta fa sia obligaziun

*Doris Leuthard*, la presidenta da la confederaziun, ha constatà che La Posta adempleschia cumpletamain sia obligaziun. En cas che La Posta sistescha la distribuziun a domicil procura ella per ina substituziun, per exempel ina chascha postalala u ina chascha da brevs dasper la via. En questas situaziuns sto ella prender contact cun il destinatur. Sche La Posta po offrir ina alternativa vala quai sco ademplì l'obligaziun da distribuziun. Il parlament è dendant liber da pretender midadas da la lescha. Qua sa tschenta la dumonda: «Tgi paja ils custs»? La distribuziun è cumbinada cun considerabels meds finanzials. Cun 28 cunter set vuschs e tshintg abstenziuns ha il cussegl dals chantuns acceptà la moziun. Cun quai ch'il cussegl naziunal ha gia ditg gea sto il cussegl federal uss elavurar propostas per adattaziuns da la lescha.



**Da dretg: Cusseglier dals chantuns Stefan Engler (pcd GR) en discurs cun ses collega Konrad Graber (pcd LU).**

KEYSTONE